

आकाशवाणी

खबरां

1. नितिन नबीन बीजेपी दे नमे राश्ट्री अध्यक्ष बनी गेन। दिल्ली च पार्टी मुख्यालय उनें प्रधानमंत्री मोदी ते होरनें सीनियर लीडरें दी मजूदगी च अपना औहदा साम्भेआ।
2. प्रधानमंत्री नरेंद्र मोदी होरें मेद प्रगट कीती ऐ जे नितिन नबीन पार्टी दे आदर्शें, सिद्धांतें पर चलदे होई संगठन गी नमिं उंचाइं पर लेई जाह्ग ते उंदी युवा उर्जा ते तर्जुबा पार्टी लेई मता कारी दा साबत होग।
3. सबरी माला मंदरै च सुन्ने ते होरनें संपत्तिं च हेरा-फेरी दे मामले च ई.डी नै अज्ज केरल, तमिलनाडू ते कर्नाटक च 21 ठकानें पर छापेमारी कीती ऐ।
5. तमिलनाडू दे राज्यपाल आर.एन रवि होरें अज्ज डी.एम.के सरकार आसेआ लिखिए दिन्ते गेदे ब्यौरे गी पढने सवां इंकार करी दिता ऐ।
6. खेलो इंडिया स्यालू खेडें दा 6मां संस्करण अज्ज लेह च शुरू होआ। 21 राज्यें ते केंद्र शासित प्रदेशें थमां खडारी हॉकी ते स्केटिंग समेत होरनें केई खेडें च हिस्सा लै करदे ना।

<><><><><><>

BJP-President

भारती जनता पार्टी दे कार्जकारी अध्यक्ष नितिन नबीन पार्टी दे राश्ट्री अध्यक्ष बनी गे ना। अज्ज नमीं दिल्ली च बीजेपी मुख्यालय च संगठन पर्व दे मौके पर पार्टी दे राश्ट्री रिटर्निंग अफसर डॉ. के लक्ष्मण होरें उन्दे नां दी घोषणा कीती। बीजेपी दे सीनियर लीडर ते प्रधानमंत्री नरेंद्र मोदी ते केंद्री मंत्री अमित शाह, राजनाथ सिंह, जे.पी नड्डा ते नितिन गडकरी होरें उनेंगी बधाई दिती। इस मौके प्रधानमंत्री मोदी होरें उनेंगी ममारकबाद दिंदे होई आखेआ कि नबीन होरें पार्टी दिएं परम्पराएं, सिद्धांतें ते विरासत गी होर अगडे ते नमिं उंचाइं तगर लेइए जाडन। उनें आखेआ जे नमें नियुक्त भाजपा राश्ट्री अध्यक्ष उस पीढी थमां न जिन्नै मुलखै च केई बड्डे आर्थिक, सामाजिक ते तकनीकी बदलाव दिक्खे न ते उन्दे च युवा उर्जा ऐ ते संगठन दे कम्में दा व्यापक तर्जुबा बी जेहडा पार्टी दे हर इक कार्जकर्ता लेई कम्म करने च बडा फैयदेमंद साबत होंदा ऐ। प्रधानमंत्री होरें आखेआ कि बीजेपी पर जनता दा विश्वास उप्परोतली मजबूत होंदा जा'रदा ऐ ते पिछले 11एं बरें च पार्टी नै जनता दा बसाह भरोसा हासल करने च काबले जिक्र सफर तैह कीता ऐ। उनें जोर देइयै आखेआ कि जनसेवा सदा थमां गै पार्टी दी सभनें शा पैहली तरजीह रेही ऐ। उनें आखेआ कि बीजेपी इक ऐसी परम्परा ऐ जेदी औहदे कन्नै नेई प्रक्रिया कन्नै चलदी ऐ। उनें आखेआ कि पार्टी दे अध्यक्ष समें-समें पर बदलदे रौहंदे न पर आदर्श कदें नेई। नितिन नबीन होरें इस मौके प्रधानमंत्री हुंदे समेत पार्टी दे सभनें लीडरें ते कार्जकर्ताएं दा आभार प्रगट कीता।

<><><><><><>

ED-Raids

सबरी माला मंदर थमां सुन्ना ते होर दुइएं संपत्तिं दे चोरी आले मामले च ई.डी नै केरल, तमिलनाडू ते कर्नाटक च 21 ठकानें पर छापे मारे ना। ई.डी दी इस कार्रवाई दा मकसद मंदरै दी संपत्ति च हेराफेरी करने आहलें दा पता लाने, अपराध कन्नै कमाए गेदे पैहें दा पता लाना, लाभार्थिं दी पंछान करना ते दस्तावेजें ते डिजिटल सबूतें गी जब्त करना ऐ तां जे इस सारी गडबडी दे पिच्छे दोशिं गी कनून तैहत सजा दोआई जाई सकै। ई.डी नै इक बयान च आखेआ ऐ कि शुरूआती जांच थमां पता लग्गा ऐ कि 2019 कोला 2025 दे दरम्यान सोने कन्नै मढी दिएं पवित्र चीजें गी जानी बुज्जियै अधिकारिक रिकाउर् च तांबे दी प्लेट दे रूपै च दस्सेआ गेआ ते गैर कनूनी तरीके कन्नै इनेंगी मंदर चा बाहर लेता गेआ।

<><><><><><>

AP CM UAE Minister

आंध्र प्रदेश दे मुखमंत्री एन चंद्रबाबू नायडू होरें संयुक्त अरब अमीरात दे खजाना ते सैलसफा मंत्री अब्दुल्ला बिन तोक अल मारी हुंदे कन्नै विश्व आर्थिक फोरम शिखर सम्मेलन च दावोस च मलाटी कीती। बैठक दरान नायडू होरें

खाद्य सुरक्षा, लाजिस्टिक्स, बंदरगाह आधारित उद्योग, परतिए इस्तेमाल होने आली उर्जा, शैहरी विकास, सैलसफा ते ढांचागत विकास च निवेश दे मौकें पर लो पाई। गल्लबात दरान आंध्र प्रदेश ते संयुक्त अरब अमीरात बश्कार आर्थिक सांझेदारी बढ़ाने पर जोर दित्ता गेआ। अल मारी होरें दुबई फुट क्लस्टर राएं आंध्र प्रदेश कन्नै फूड प्रोसेसिंग दे क्षेत्र च रलिए कम्म करने दी गल्ल कीती।

<><><><><><>

EU-leaders

यूरोपीय संघ दे मुखें दे नेता अतरूं वीरवारें इक इमरजेंसी बैठ करंगन। यूरापीय संघ आयोग दे प्रवक्ता आलोफ गिल होरें इस बारै जानकारी सांझी करदे होई दस्सेआ ऐ जे इस बैठक च ग्रीनलैंड हासल करने सरबंधी राष्ट्रपति डोनल्ड ट्रम्प हुंदी इच्छेआ मुजब बादू टैक्स लाने दी अमरीका दी धमकिएं पर ध्यान केंद्रित कीता जाह्ग। उनें आखेआ कि यूरोपीय संघ टैक्स धमकिएं गी लेइयै सभनें स्तरें पर वाशिंगटन कन्नै संपर्क साधने दी कोशिश करा'रदा ऐ। यूरोपीय संघ अपने आर्थिक हितें दी रक्षा लेई हर मुमकिन गैं पुट्टा'रदा ऐ। आयोग दे प्रवक्ता नै आखेआ ऐ कि यूरोपी संघ शुल्क लागू होने दी सूरतै च जवाब देने लेई पूरी चाल्ली त्यार ऐ। एहदे शा पैहले यूरोपी संघ दे राजदूतें इक इमरजेंसी इजलास लेई पिछले ऐतवारें ब्रेसल्लस च मलाटी बी कीती ही।

<><><><><><>

TN Governor Address

तमिलनाडू दे राज्यपाल आर.एर रवि होरें अज्ज डीएमके सरकार आसेआ त्यार लिखित विवरण गी अपने संबोधन दे हिस्से दे तौरा पर राज्य विधानसभा च पढने थमां इंकार करी दित्ता जेदा कारण औहदे च गलतियां हा। लोक भवन नै विस्तार कन्नै इस बारै सफाई पेश कीती ऐ। राज्यपाल होरें संबोधन पढने थमां इंकार करी दित्ता जिसलै उंदा माइक्रोफोन बार-बार बंद होआ'रदा हा ते उनेंगी सदन च अपने विचार रखने दी इजाजत नेई दित्ती गेई। लोकसभा भवन नै आखेआ जे तमिलनाडू सरकार दा दावा ऐ जे राज्यच 12 लक्ख करोड रपे दा निवेश होआ ऐ, एहू गल्ल सच नेई ऐ। राज्यपाल होरें वाँकआउट दा कारण दस्सेआ जे राष्ट्री गान नेई बजाया गेआ। तमिलनाडू दे मुखमंत्री एम.के स्टेलिन होरें आखेआ जे उपराज्यपाल हुंदी हरकत चुनी गेदी सरकार गी बेजती ऐ ते गैर संवैधानिक ऐ।

<><><><><><>

Kerala Budget Session

केरल विधानसभा दा बजट सत्र अज्ज तिरुवंतापुरम च शुरू होआ। राज्यपाल राजेंद्र विश्वनाथ अरलेशकर होरें अपने संबोधन च आखेआ जे केरल विकास दी बत्तै पर अगडा बदा'रदा ऐ। खजाना मंत्री के एन बालागोपाल होर इस म्हीने दी 29 तरीक गी राज्य बजट पेश करंगन। विधानसभा कैलेंडर दे मताबक मौजूदा सत्र इस बरे 26 मार्च तोड़ी चलोग।

<><><><><><>

Syria

सीरिया दे गृह मंत्रालय नै अज्ज आखेआ ऐ कि उत्तर पूर्व सीरिया दी इक जेल थमां इस्लामिक स्टेट दे 120 कैदी फरार होई गए न। मंत्रालय नै इक बयान च आखेआ कि सरकारी थेआरबंद बलें ते कुर्द नेतृत्व आहले सीरियाई डेमोक्रेटिक बलें बश्कार झड़फें दे बाद एहू घटना पेश आई ऐ। अजें कि बयान च इब्बी दस्सेआ गेआ ऐ जे सुरक्षा बलें 81 कैदिं गी परतिए फगडी बी लैता ऐ।

<><><><><><>

Australia Gun

आस्ट्रेलिया दी संसद नै पिछले म्हीने सिडनी च इक यहूदी उत्सव दरान दऊं बंदूकधारिं आसेआ 15 लोकें दी हत्या करी देने दे बाद प्रस्तावित नमीं बंदूक पाबंदिं गी मंजूरी देई दित्ती ऐ ते प्रस्तावित नफरत बरोधी भाशण कनूनें दे मसौदे पर चर्चा शुरू कीती ऐ। इनें बंदूक कनूनें दे तैहत बंदूक रखने पर नमियां पाबंदियां नाफस कीतियां गेइयां न ते सरकार आसेआ पैहा उपलब्ध कराने सरबंधी इक वाय बैंक काजक्रम बी शुरू कीता गेआ ऐ। एहदे तैहत थेआर सौंपने आहले लोकें गी मुआवजा दित्ता जाह्ग। नफरत फैलाने आहले भाशणें दे बरोधी कनून तैहत उनें समूहें गी गैर कनूनी घोशित कीता जाई सकग जेहडे आतंकी संगठनें दी श्रेणी च नेई औंदे।

<><><><><><>

Balochistan

बलूच यकजेहती कमेटी बी.वाई.सी नै 25 जनवरी गी बलूच नरसंहार यादगारी ध्याडा मनाने दी घोशणा कीती ऐ। समूह नै इस तरीक गी 25 जनवरी 2014 कन्नै जोड़ेआ ऐ जदू बलूचिस्तान दे टूटक क्षेत्र च इक सांझी कबर च जबरदस्ती गैप कीते गेदे 100 कोला कोला मते बलूच नौजोआनें दियां कप्पी टुक्की दियां लोथां बरामद होइयां हियां। द बलोचिस्तान पोस्ट दी इक रिपोर्ट दे मताबक बी.वाई.सी नै दुनिया भर दे बलूच समुदायें अगगे ऐसे कार्यक्रम आयोजित करने दा आह्वान कीता ऐ तां जे बलूचिस्तान च पाकिस्तानी अधिकारिएं आसेआ केई दाहकें थमां कीती जा'रदी हिंसा जबरन अगवाह ते गायब करने ते जुल्म ज्यादतिएं बक्खी ध्यान आकर्षित कीता जाई सकै।

<><><><><><>

Pak-Fire

जंदे रोज पाकिस्तान दे कराची च इक शापिंग प्लाजा च अगग लग्गने दी इक घटना च मरोने आहलें दी गिनतरी 28 होई गेई ऐ ते 80 लोक अजें बी लापता ना। पुलस सर्जन सुम्मैया सैयद होर तस्दीक कीती ऐ जे अजें तोड़ी 28 लोथां जिन्ना अस्पताल पुज्जी चुकी दियां न ते ईमारत दे मलबे हेठ किन्ने लोक फसे दे न उंदा कोई पता नेई ऐ। अजे धोड़ी छड़े 18 शवें दी पंछान होई सकदी ऐ।

<><><><><><>

Khelo India Winter Games

खेलो इंडिया स्यालू खेड-2026 दा पैहला गेड़ अज्ज लद्दाख दे लेह च शुरू होआ जेहदे च कोचें ते तकनीकी अधिकारिएं सने इक ज्हार शा मते मर्द ते महिला एथलीट हिस्सा लै करदे ना। इस बरे दा नमां आकर्षण फिगर स्केटिंग जेड़ी इक ओलंपिक खेड ऐ, दी शुरूआत ऐ। स्यालू खेडें दे पैहले गेड़ दा आयोजन लद्दाख दे युवा सेवाएं ते खेड मैहकमे आसेआ भारत खेड प्राधिकरण दी दिक्ख-रिक्ख च कीता जा'रदा ऐ। इनें खेडें दे दुए चरण दी मेजबानी जम्मू-कश्मीर आसेआ गुलमर्ग च कीती जाहगा। कोचें ते तकनीकी अधिकारिएं सने इक ज्हार शा मते मर्द ते महिला एथलीट हिस्सा लै करदे ना। इस बरे दा नमां आकर्षण फिगर स्केटिंग जेड़ी इक ओलंपिक खेड ऐ, दी शुरूआत ऐ। स्यालू खेडें दे पैहले गेड़ दा आयोजन लद्दाख दे युवा सेवाएं ते खेड मैहकमे आसेआ भारत खेड प्राधिकरण दी दिक्ख-रिक्ख च कीता जा'रदा ऐ। इनें खेडें दे दुए चरण दी मेजबानी जम्मू-कश्मीर आसेआ गुलमर्ग च कीती जाहगा।

<><><><><><>

Iran-Killing

ईरान दे सभनें शा बड्डे नेता अयातुल्ला अली खामेनेई नै उत्थै बरोध-प्रदर्शनें दे चलदे ज्हारां लोके दे मारे जाने दी तस्दीक कीती ऐ ते एहदे लेई पूरी चाल्ली अमरीका गी जिम्मेदार ठहराया ऐ। मनुक्खी अधिकार संगठनें मुजब इनें बरोध प्रदर्शनें च 4 ज्हार 29 लोक मारे गए ते 26 ज्हार कोला मते घायल होई गए ना। तोआई ईरान च होए दे सरकारी बरोधी प्रदर्शनें ते कारवाई दे चलदे स्वित्जरलैंड दे दावोस च जारी विश्व आर्थिक मंच शिखर सम्मेलन च ईरान दे विदेश मंत्री अब्बास अराघची हुंदा साहा रद्द करी दित्ता ऐ।

<><><><><><>

Silver Surge

चांदी की कीमतें च उछाल मंगलवारें दर्ज कीता गेआ। चांदी दी कीमत 3.2 लक्ख रपे किलो पुज्जी गेई ऐ ते सुन्ने दा भाऽ 1 लक्ख 48 ज्हार रपे फही 10 ग्राम पुज्जी गेआ ऐ। सोमवारें चांदी दी कीमत पैहली बारी 3 लक्ख शा पार होई ते 3 लक्ख 10 ज्हार 275 रपे फही किलो दर्ज कीता गेआ। पिछले दो बपार सत्रें थमां चांदी दा भाऽ 32 ज्हार 187 रपे यानि 11.1-8 फीसद बदेआ ऐ जेड़ा के 16 जनवरी गी 2 लक्ख 87 ज्हार 762 रपे हा। सुन्ने दी कीमतें च बी घरेलू ते अंतरराष्ट्री बजार च बडी तेजी आई ऐ। फरवरी आस्तै सुन्ने दी डिलीवरी 2 ज्हार 560 यानि 1.7-6 फीसद थमां बदिए 1 लक्ख 48 ज्हार 199 रपे फही 10 ग्राम बदी गेआ ऐ।

<><><><><><>

Search Operation

किश्तवाड़ जिले दे उप्परले इलाके च आतंकवादिऐं गी खदेड़ने आस्तै तपाशी अभियान त्रीए ध्याडे पुज्जी गेआ ऐ ते किश लोके गी सवाल जोआब आस्तै हिरासत च बी लैता गेआ ऐं आकाशवाणी जम्मू संवाददाता नै जानकारी दित्ती ऐ जे आपरेशन ऐतवारें छात्रु बेल्ट च मंद्राल सिंघपोरा दे कश सोनार ग्रांऽ च शुरू कीता गेआ हा जिस दरान

गोलीबारी शुरू होई गई जेदे च 1 पैराट्रपर शहीद होई गोआ ते 7 दुए घाऽल होई गए ना। आतंकवादी घने जंगलें च छप्पी गए पर उन्दे ठिकाने दा पता लाई लैता गोआ ऐ जित्थे स्याले आस्तै पूरा बंदोबस्त जियां खाने-पीने दा समेयान, कंबल, भांडे वगैरा रक्खे गेदे हे। आई.जी.पी जम्मू प्रांत भीम सेन टूटी ते आई.जी.सी.आर.पी.एफ जम्मू आर गोपाला कृष्णा राव सने कई वरिष्ठ अधिकारी टाकरे आहली थाहर पुज्जे ते किश सेना अधिकारिणं कन्नै आपरेशन दी दिक्ख-रिक्ख आस्तै उत्थे गै मौजूद ना।

<><><><><><>

IED Found

सुरक्षाबलें अज्ज श्रीनगर बारामूला जरनैली शिडकै पर इक I.E.D दा पता लाइयै उसी कामयाबी कन्नै समेंसिर नकारा करी दित्ता जेदे कन्नै कुसै बी माड़ी घटना थमां बचा होई गोआ। I.E.D गी सुरक्षाबलें दे गशती दल नै दिक्खेआ हा। पता लगगने दे बाद इलाके गी फौरी तौरा पर घेरी लैता गोआ ते एहतियात दे तौरा पर हाइवे पर बी आमदोरफ्त गी रोकी दित्ता गोआ। बम्ब निरोधक दस्ते नै मौके पर पुज्जियै I.E.D गी नकारा कीता। ध्यानजोग ऐ जे एहू घटना 26 जनवरी आले समारोहें कोला किश चिर पैहले सामने आई ऐ जेदे मद्देनजर कश्मीर घाटी च सुरक्षा दे बंदोबस्त होर बी पुख्ता करी दित्ते गए न तां जे कुसै बी माड़ी घटना थमां बचा कीता जाई सकै।

<><><><><><>